

03 FEB 2001

Pertanian-bengkel

PERSATUAN JURUTERA ANJUR BENGKEL PERTANIAN PINTAR

KUALA LUMPUR, 3 Feb (Bernama) -- Persatuan Jurutera Pertanian Malaysia (MSAE) menganjurkan bengkel pertanian pintar bagi mendapatkan sokongan sektor bukan pertanian dalam penggunaan teknologi tinggi.

Presidennya Prof Madya Ir Dr Mohd Amin Mohd Soom berkata bengkel itu yang akan diadakan mulai 13 hingga 15 Mac ini di Hotel Renaissance, Putrajaya akan memberikan tumpuan bagaimana pertanian boleh ditingkatkan melalui penggunaan teknologi tinggi.

MSAE memberikan sokongan kepada saranan Perdana Menteri Datuk Seri Dr Mahathir Mohamad untuk memberikan tumpuan kepada pertanian dan pengeluaran makanan.

"Sebagai jurutera pertanian, kami yakin dengan kepimpinan Perdana Menteri, dan era lonjakan quantum dalam arena pertanian Malaysia telah tiba," katanya dalam satu kenyataan.

Dr Mahathir berkata pada Khamis lepas Malaysia akan memberikan tumpuan kepada pertanian untuk meningkatkan pengeluaran makanan untuk mengurangkan kos import makanan dan meningkatkan eksport.

"MSAE memberikan sokongan kepada Perdana Menteri dan Menteri Pertanian berkaitan isu pertanian bagi kebaikan rakyat dan negara," katanya.

Beliau berkata peningkatan dalam sektor pertanian dapat dicapai melalui penggunaan teknologi tinggi.

Bagi membantu penggunaan teknologi tinggi dalam sektor tersebut, Amin berkata input dari ahli sains komputer, elektronik dan mekanikal adalah diperlukan.

Maklumat lanjut berkaitan bengkel itu boleh diperolehi dengan menghubungi talian 03-89486101 samb 2018, e-mel wiwi@eng.upm.edu.my atau melawat laman web <http://www.eng.upm.edu.my/kbp/>.

-- BERNAMA

MUN AZZ RI